

# Wallensköld

## I.

Sire, loëz moi a choisir  
d'un gieu! Li quels doit melz valoir:  
ou souvent s?amie sentir,  
besier, acoler, sanz veoir,  
Sanz parler et sanz plus avoir  
a touz jorz mès de ses amors,  
ou parler et veoir touz jorz,  
sanz sentir et sanz atouchier?  
Se l?un en couvient a lessier,  
dites li quels est mains joianz  
et du quel la joie est plus granz.

## II.

Raoul, je vous di sanz mentir  
que il ne puet nul bien avoir  
en prendre ce dont a morir  
couvient ami par estouvoir;  
mès, quant il ne puet remanoir,  
el veoir a plus de secors  
et el parler qui est d?amors.  
Si bel ris et si solacier  
feront ma dolor alegier,  
que je ne vueil estre senblanz  
Meremellin ne ses paranz.

## III.

Sire, vous avez mult bien pris  
de vostre amie regarder,  
que voz ventres gros et farsis  
ne porroit sousfrir l?adeser,  
et por ce amez vous le parler  
que voz solaz n?est preus aillors.  
Ensi vait des faus pledeors,  
dont li senblant sont mençongier.  
Mès d?acoler et de besier  
fet bone dame a son ami  
cuer large, loial et hardi.

## IV.

Raoul, du regart m'est a vis  
q'il doit plus ami conforter

qu'estre de nuiz lez li pensis  
la ou l'en ne puet alumer,  
veoir, oïr, joie mener;  
l'en n'i doit avoir fors que plors.  
Et s?ele met sa main aillors,  
quant vous cuidera embracier,  
se la potence puet baillier,  
plus avra duel, je vous afi,  
que de mon gros ventre farsi.

## V.

Rois, vous resenblez le gaignon  
qui se revanche en abaiant;  
por ce avez mors en mon baston  
de quoi je m'aloie apuiant.  
Mès pris avez a loi d'enfant;  
car il n'est si granz tenebrors,  
se je pouoie les douçors  
de ma douce dame embracier,  
Qui ja me poïst ennuier;  
et si me puis melz delivrer  
de mon bordon que vous d'enfler.

## VI.

Raoul, j'aing melz nostre tençon  
a lessier tout cortoiselement  
que dire mal, dont li felon  
riroient et vilaine gent,  
et nous en serions dolent;  
Mès mult vaudroit melz en amors  
veoir et oïr qu'estre aillors,  
rire, parler et solacier  
douz moz, qui font cuer tatouillier,  
et resjoïr et saouler  
que en tenebres tastoner.

- letto 167 volte